

# Maćica Serbska ma wosom nowych čłonow

**Na hłownej zhromadźiznje Maćicy Serbskeje sobotu w Budyskim Serbskim muzeju su čłonojo – mjez nimi tež štyrjo z wosom nowych – předsyźe Janej Malinkej dowěru na dalšej dwě lěće wuprajili.**

**Budyšin** (SN/CoR). Za lětdžesatkaj dobrego zhromadneho dźěla dżakowaše so předsyda Maćicy Serbskeje Jan Malink nawodže Serbskeho muzeja Tomaszej Nawce po jeho poslednim witanju jako hosćiciel hłownej zhromadźizny. Nawka poda so kónc měrca na wuměnk. Ze spominanjom na zemřetych Maćicarjow Bena Kućanka, dr. Bena Korjerńka a Arnošta Grofu zahaji na to dr. Anja Pohončowa lětuše schadźowanje něhdže 40 čłonow. Zdobom bě wustajeńca muzeja „Jutrowne naložki mjez herbstwom a eventom“ přeni raz přistupna.

„Sym dżakowny, zo njetrjebachmy so ze žanymi wótrymi politiskimi diskusijemi zaběrać“, započa Jan Malink swoju rozprawu a wospjetowaše zdobom reformowe žadanje, zo ma so Založba za serbski lud na financowanje koncentrować a kulturne nadawki kulturnikam přewo-

stajić. Woběmaj přispomnjenjomaj přizamkny so w swojim postrownym słowje předsyda Domowiny Dawid Statnik. Malink informowaše wo tym, zo su ekspozaty, kotrež bě Měščanski muzej Budyšin po rozpušćenju Serbskeho domu přez nacijow dóstał, na iniciatiwu mě-



**Jan Malink je dale předsyda Maćicy Serbskeje.**

Foto: SN/  
M. Bulank

ščanskeho muzeja nětko Serbskemu muzejnej přepodal. Přiwzali su čłonojo namjet předsydstwa, w nošerskim towarstwje Serbskeho instituta sobu skutkować. Próstwa wo přiwzaće ma so stajić. Dale wobzamknychu, zo ma so nimo dorostowych mytow Šwjele, Hórnik a Muki přichodnje tež spěchowanske myto

spožćić. Z předsydstwa Maćicy je so dr. Christiana Piniekowa rozžohnowała, wobkrućeni su dr. Annett Brězanec, Jěwa-Marja Čornakec, Marko Kowar, Jurij Łušćanski, Janka Pěčkojc de Lévano, dr. Anja Pohončowa a dr. Pěťš Šurman. Nowa člonka Marka Cyžowa z Lejna chce w hudźbnej sekciji sobu skutkować.

W rozprawach delnjoserbskeje Maćicy a sekcijow literatura a wuměłstwo, stawizny, ludowěda a muzejownistwo, Delnjoserbskeje a Hornjoserbskeje rěčneje komisije a pomnikoweho wuběrka pokazali so sylny angažement Maćicarjow, wědy wo Serbach w tu- a wukraju šěrić. Na nowym dźěłowym planje steji mjez druhim wobnowjenje rowa Jana Arnošta Smolerja na Budyskim Hrodžišku. Dobry wothłos dósta w diskusiji namjet bywšeho šefredaktora Rozhlada Richarda Bigla, zo maja serbske institucije přichodnje zakonsce zaručene prawo zwoprawdźić a adresy na listach jeno serbsce pisać, jeli adresat to chce. Nowa Maćicarka Theresa Jacobsowa přednošowaše wo temje swojeho doktorskeho dźěla. „Rěčimy lěpje wo ludowych rejach Serbow hač wo serbskich ludowych rejach“, rěka jeje facit.